

La impuartance dal furlan te aministrazion publiche

La presince dal furlan te aministrazion publiche e je une vore impuartante.

Al è un fatôr primari di democrazie il fat che un citadin a sedi libar di fevelâ la sô lenghe cuant che al à ce fâ cu lis istituzions e che al puedi ancje vê rispuestis te sô lenghe.

Cun di plui al è ancje un segnâl di rispjet che al fâs in maniere che la int no si vergogni di fevelâ par furlan: tal moment che si viôt che il furlan al jentre in Municipi, in Provincie, in Regjon e vie indevant, la int e torne a calcolâlu un alc di impuartant, come che al è.

Il fat di doprâ il furlan al pues ancje judâ la aministrazion a jessi plui semplice e clare, a esprimisi intune lenghe plui direte e facile di capî, ancje se precise e concrete come che al covente: cjapant esempi de sveltece dal furlan ancje il talian burocratic al varà un vantaç.

Cun di plui doprâ il furlan te aministrazion publiche al devente ancje une ocasion par fâ sparî tantis espressions di injustizie e di discriminazion: par esempi ancjemò in di di vuê la plui part dai modui talians al tache cu la formule
..... sessiste “Il sottoscritto..... nato a.....” cence tignî cont che ancje lis feminis a àn dirit di citadinance. Tes traduzions par furlan dutis chestis formis a vegnin mendadis cun “Jo nassût/nassude a”

Il Comun di Gonars

Il Comun di Gonars al è impegnât par aplicâ lis leçs di tutele; al à domandât e vût un finanziament cu la Leç 482 e cun chei bêçs al à fat o al fasarà in curt:

- un sportel linguistic
- un laboratori linguistic pe scuele che al coventarà ancje par chês altris lenghis
- un gnûf sît internet, la modulistiche principâl dal comun e la cjarte dai servizis par furlan
- un studi di toponomastiche sui nons des stradis e des localitâts dal comun
- lis tabelis dai nons dei stradis par furlan
- la segnaletiche interne dal Municipi par furlan
- gnovis tabelis turisticis, scritis par furlan, ma ancje in maniere semplice e facile di capî
- cors par dâ al personâl plui competence tal fevelâ e tal scrivi par furlan.

Il Comun al invide ducj i citadins a doprâ il furlan in dutis lis ocasionis e a judânus a fâ cressi chest grant patrimoni che o vin.




COMUNE DI GONARS
COMUN DI GONÂRS

La lenghe e je un dirit


**Il furlan:
une lenghe,
un dirit,
un valôr**

I furlans a àn simpri tignût ae lôr lenghe, ma in cheste fase storiche si va a pericol di pierdile simpri di plui par vie di une politiche linguistiche negative che e je stade fate vie pal ultin secul. Par fortune in chescj ultins agns, ancje se cuntun grant ritart rispjet aes declarazions di principi che a son, par esempli, te costituzion de Republiche Taliane, a son rivadis leçs di tutele des lenghis minoritariis e ancje dal furlan in particulâr.



Tal 1996 la Regjon Friûl Vignesie Julie e à fat buine la leç regionâl 15, che e ricognòs te lenghe furlane un dai elements plui impuartants che a justificin la autonomie regionâl, che e fisse une buine volte la ortografie uficiâl di riferiment, che veve istituît l'Osservatori de Lenghe e Culture Furlanis (OLF) par coordinâ la politiche linguistiche furlane. Juste cumò une gnove strutture, la Agenzie Regionâl pe Lenghe Furlane, e cjape il puest dal OLF. Tal 1999 il Stât Talian al à infin dât une leç par corispuindi al principi di tutele des minorancis linguistiche che si cjate tal articul 6 de costituzion repubblicane.

Cu la leç 482 si ricognossin lis minorancis slovene, furlane, todesche, ladine, francese, francoprovençâl, occitane, sarde, catalane, greghe, albanese, cravuate. Chestis lenghis a son feveladis di cetancj secui di diversis bandis dal teritori de republiche taliane e cu la leç 482 si ricognòs il drit di doprâlis ancje in maniere uficiâl te amministrazion publiche, te scuele, te comunicazion radiotelevisive.



Tal 1992 a Strasburc divers Stâts membris dal Consei di Europe, ancje la Italie, a àn firmât la Cjarte Europeane pes lenghis regionâls o minoritariis, une convenzion impuartante che e ricognòs intes lenghis minoritariis un element di fonde de Europe. Si da valôr al aspjet culturâl, ma ancje a chel politic e

economic, e si viôt la juste tutele di dutis lis comunitâts linguistiche tant che un procediment di garanzie de libertât e de democrazie e tant che une maniere vere di fâ cuintri ai nazionalisims e aes discriminazions. La Cjarte Europeane e sburte e impegne i stâts a tutelâ e a promovî lis lenghis minoritariis te amministrazion publiche, in ducj i nivei di istruzion, inte comunicazion, massime radiotelevisive, tai tribunâi e in ducj i aspjets de vite sociâl e economiche. La Italie e à dome firmât chest document e no lu à ancjemò ratificât: lis leçs di tutele che a son fin cumò a son pal solit plui debulis di ce che e domande la Cjarte Europeane.

